

Bina rumah untuk disewa kepada warga asing antara RM500 sehingga RM1,200

Tuan tanah kaut untung?

Oleh ZULFADLI SHARIFUDIN
kota@utusangroup.com.my

■ HULU LANGAT 17 FEB.

KEWUJUDAN sebuah penempatan warga asing di Kampung Kenangan 18, Sungai Makau, Jalan Sungai Tekali di sini menimbulkan rasa kurang senang penduduk yang menetap di kawasan tersebut.

Penempatan itu didakwa dibina di atas tanah milik persendirian oleh pemilik tanah untuk disewakan kepada warga asing sejak tiga



tahun lalu.

Tinjauan *Utusan Malaysia* ke lokasi terbabit hari ini mendapati, terdapat kira-kira 60 unit rumah yang menempatkan kira-kira 30 penghuni warga Myanmar, Vietnam, Indonesia dan sebagainya.

Apa yang mengejutkan, pihak tidak bertanggungjawab turut menceroboh tanah rizab sungai

bersebelahan tapak itu dengan membina perumahan yang dijadikan penempatan warga asing, sekali gus mengencilkan laluan aliran sungai.

Tinjauan turut mendapati, keadaan persekitaran amat kotor dan memualkan ekoran timbunan sampah serta barangan lusuh seperti perabot, televisyen, mesin basuh, besi buruk, tangki simpanan air dan sebagainya.

Warga asing dipercayai menjalankan aktiviti perniagaan barangan lusuh di situ sehingga menyebabkan barang-barang itu

melimpah hingga ke dalam sungai yang sekali gus mengakibatkan pencemaran.

Selain itu, rata-rata daripada mereka fasih berbahasa Melayu, selain turut menjalankan aktiviti perniagaan barangan runcit dan gerai makan di kawasan tersebut.

Ketika tinjauan dilakukan, pemilik tanah itu didakwa tinggal bersebelahan penempatan itu, namun menghilangkan diri seolah-olah menghidu kehadiran kami.

Apa yang mengecewakan, sehingga kini tiada apa-apa tindakan dijalankan pihak berkuasa dalam

menangani isu tersebut.

Sementara itu, seorang peniaga besi buruk yang berasal dari Myanmar, Harun Sulaiman, 40, berkata, dia telah menetap di kawasan itu sejak setahun lalu.

“Kadar sewa di penempatan ini bernilai antara RM200 hingga RM1,500 mengikut keluasan rumah,” katanya.

Seorang lagi warga Vietnam yang enggan dikenali berkata, dia menyewa salah sebuah rumah di kawasan itu bersama rakan-rakan senegarannya yang bekerja di sebuah kilang berhampiran.



TIMBUNAN barangan kitar semula mewarnai kawasan penempatan berhampiran Kampung Kenangan 18, Sungai Makau, Jalan Sungai Tekali, Hulu Langat, Selangor. - UTUSAN/ZAINI HUSIN